

Siunnersuut uunga: Utoqqarnut tapersersuinissaq pillugu Inatsisartut inatsisaat
(Isumaginninnermut, Ilaqutariinnut, Suliffeqarnermut Nunamullu Namminermt Naalakkersuisoq)

Saqqummiussissut
(Isumaginninnermut, Ilaqutariinnut, Suliffeqarnermut Nunamullu Namminermt Naalakkersuisoq)
Siullermeerinnineq

Naalakkersuisut Utoqqaat pillugit periusissiatik saqqummiuummassuk, suliniutit pingaarnersaata ilaat tassaavoq utoqqartatsinnut pisinnaatitaaffiit qulakkeerneqarnissaat. Utoqqarnut tapersersuinissaq pillugu Inatsisartut inatsisaat manna atorlugu taamaaliorpugut.

Ukiuni aggersuni innuttaasugut amerlasuut soraarninngortussaapput. Ullumikkut inuit 67-ileereertut 4500 missaanniipput. Ukiut 15-iinnaat qaangiuppata 7000-t anguneqassapput. Utoqqaat amerlassusaat qaffiakkiartorpoq, aamma assinganik utoqqarnut suliasaqarfimmi aningaasartuutit. Peqatigalugu ullumikkut siunissamilu utoqqaat amerlasuut pillugit kommunit allaffissornikkut piareersimanissaannut pisariaqartitsineq qaffakkiartorpoq. Taamaattumik Naalakkersuisunut qitiutinneqarpoq kommuninut pitsaasumik sinaakkusiinissaq, taamaalillutik inuiaqatigiit agguataarnerat piareersimaffineqarniassammat.

Utoqqaat tusaaneqarnissaminnut pisinnaatitaapput. Utoqqaat pisariaqartitaminnik naliliiffigineqarnissamut pisinnaatitaapput. Utoqqaat ikiorneqarnissamut eqqortumillu tapersersorneqarnissamut pisinnaatitaapput. Utoqqarnut suliasaqarfimmut aalajangersakkat inatsisinut arlalinnut siaruaqqapput malittarisassallu pisoqalillutik. Inatsisip matuma siunertaraa malittarisassanik iluarsaassinissaq nutarterinissarlu. Utoqqarnik ikiuineq kommuninut ajornannginnerusariaqarpoq. Inatsisartut inatsisaata matuma kommunit inatsimmut ataasiinnarmut ujartuinissaat qulakkeerpaa.

Inatsisartut inatsisaata matuma qulakkeerpaa, ujartuinerulluni suliniuteqarnermik utoqqaat nalaataqarnissaat. Kommunit utoqqaat pisariaqartitaannik naliliinernik suliaqassapput pisariaqartitsinerallu naapertorlugu tapersersuinissamik neqerooruteqarlutik. Pisariaqartitsinerat assigiinngisitaarsinnaavoq annertunerunissaalu pisariaqarnani. Utoqqaat ilaat inuttut ikiorneqarnissamik isumassorneqarnissamillu imaluunniit angerlarsimaffimmi ikiorteqarnissamik pisariaqartitsisarput. Utoqqaat allat utoqqaat angerlarsimaffianni najugaqarnissamut pisariaqartitsisarlutik. Pingaarnepaavoq utoqqaat pimoorunneqarnissaat kommuniniillu tusaaneqarnissaat.

Peqatigalugu utoqqaat najugaqatigiiffiini amerlanerusunik pilersitsinissamut inatsit ammaassivoq. Angerlarsimaffik angerlarsimaffiinnaanngilaq. Angerlarsimaffeqarnitta inuunerput nassuiarpaa. Utoqqaat najugaqatigiiffii tassaapput innuttaasunut ulloq unnuarlu paaqqutarineqarnissamik pisariaqartitsinngittunut, kisianni pitsaasumik qanimullu sanileqarluni avatangiiseqarnissamik pisariaqartitsinnaasunut naleqqussagaasut. Pingaartuuvoq utoqqartatta assersuutigalugu uillartut inunnik allanik assinganik inissisimasunik angerlarsimaffissamik neqeroorfigineqarnissaat.

Takorluulaarsiuk Margrethe 83-inik ukiulik. Qanittumi uillarpog. Meeqqat ernuttallu illoqarfimmut annerusumut suliarlorlutik atuariarlorlutillu nuussimapput. Arnaq eqeersimaartuuvoq akulerusimalluarlunilu namminerlu isumagisinnaalluni. Kisianni aninissaq ajornakusoorpoq. Pingaartumik apitillugu quasatsillugulu. Taamaattumik angerlarsimaannangajattuuvoq. Allatut iliortariaqarpugut. Taamaattumik Naalackersuisut utoqqaat najugaqatigiiffissaannik amerlanerusunik pilersitsinissaq ajornannginnerulersippaat, inuit Margrethetut ittut kisimiillutik angerlarsimasinnaalersillugit, kisianni inunnut allanut ataatsimooqateqarlutik, inooqataaermik avatangiiseqarlutik taamaattorli nammineernerullutik.

Erseqqissartariaqarpoq, utoqqarnut tapersersuinissaq pillugu Inatsisartut inatsisaat manna inatsisinut pioreersunut ataqatigiissillugu isigineqassamat. Inatsisartut inatsisaat manna utoqqalinersiaqarneq, inuit innarluuteqartut, ineqarnermik tapiissutit il.il. pillugit malittarisassanik allannguinnigilaq.

Naalackersuisutut uannut pingaaruteqarpoq, utoqqartatta soqutigisaat sinnerlugit maani Inatsisartuni saqqummiunneqarnissaasa qulakkeerneqarnissaat. Utoqqarnut suliaasaqarfik pillugu oqaluukkaangatta suliaqaraangattalu periuseq nutaaq Inatsisartut inatsisaat manna atorlugu eqqupparput. Utoqqaat maannakkut namminneq inatsiseqalertussanngorput, aamma tamanna naleqquppoq. Utoqqartagummi inuiaqatigiinni uatsinnut annertuumik suliaqarput. Maanna tullinnguuppoq inuiaqatigiit utoqqarnut suliaqarnissaat.